

Prvi zamjenik visokog predstavnika i supervizor za Brčko Dennis Hearne u Banja Luci



Prvi zamjenik visokog predstavnika i supervizor za Brčko, Dennis Hearne, danas je posjetio Banja Luku. Tokom svoje prve posjete Banja Luci, prvi zamjenik Hearne se sastao sa predsjednikom Republike Srpske Miloradom Dodikom, predsjedavajućim Narodne skupštine Republike Srpske Nedeljkom Čubrilovićem, gradonačelnikom Banja Luke Igorom Radojičićem i predstavnicima opozicionih stranaka u RS.

Prvi zamjenik Hearne je sa svojim sagovornicima razgovarao o trenutnoj političkoj situaciji u Republici Srpskoj i u cijeloj Bosni i Hercegovini. Naglasio je da još uvijek ima vremena da se postigne napredak u provođenju reformi koje su bitne građanima, iako se čini da se mnoge političke stranke već pripremaju za opće izbore 2018. godine. Neophodno je provesti izbornu reformu kako bi se osiguralo neometano održavanje izbora i provođenje izbornih rezultata u 2018. godini, a ta je pitanja potrebno prioritarno dogovoriti.

U svojstvu supervizora za Brčko, Hearne je sa predstavnicima vlasti RS također razgovarao o situaciji u Distriktu, koja se smatra pozitivnim primjerom međuetničke saradnje i modelom za ostatak zemlje. Supervizor za Brčko je rekao da će raditi na očuvanju dosadašnjih postignuća u Brčkom, a posebno na

stabilnosti i održivosti Distrikta.

Prvi zamjenik visokog predstavnika Hearne također je posjetio Agenciju za osiguranje depozita BiH, državnu instituciju sa sjedištem u Republici Srpskoj, gdje se sastao sa vršiocem dužnosti direktora Agencije, Josipom Nevjestićem. Prvi zamjenik visokog predstavnika uvjerio se u dobar rad ove Agencije, i posebno u njenu efikasnost u isplati nadoknada štedišama Bobar banke i Banke Srpske nakon što su te banke bankrotirale. Bio je to jasan primjer kako državne institucije rade u interesu građana iz oba entiteta.